



Selasa, 05 Desember 2023

Ogen : 1 raja-raja 21:1-3



Taneh Pusaka



Kai nge artina taneh pusaka? Taneh si isusurken i bas orang tua nari man anak kempu. Taneh enda biasana la banci idayaken man kalak sideban. Di kune arus idayaken, e man sinursurna ngenca banci, si lit denga iketen darehna.

Bageme Nabot i bas suku Yizreel nari. Lit taneh pusaka orangtuana si isusurken man bana. Inganna isamping istana Raja Ahab, Raja Samaria. I bas taneh e me Nabot nuan-nuan, erjuma e me mata pencarinna. Melala batang anggurna janah erbuah i bas paksana. Ngena kal ate Raja Ahab taneh Nabot e sabap idahna mehumur, mejile lalap sinuan-sinuan I je nari janha ndeher ka ku istana. E maka rusaha ia gelah jadi sikerajanggenna. Ijumpai Raja me Nabot, iarih arihina gelah nggit Nabot ndayaken taneh e man bana. Berekenna kari ganti rugi si terbelangen man Nabot.

Meherga kal akap Nabot taneh pusaka orang tuana. I bas taneh e nari me orangtuana erdahin ras mpebelin-belin Nabot ras senina-seninana. Taneh orang tuana e me inganna encari guna ngelitken keperlun nggeluh. Terdauhen, taneh e pemere Tuhan si ibereken man bangsana. Taneh si ibereken Tuhan e la banci idayaken man bangsa sideban. Sabab taneh e enggo erbaleng, enggo iukur belangna man teptep suku, lanai banci itambahi. Di kune pe taneh e idayaken arus man suku Yizreel. La nggit Nabot ndayaken taneh e man Raja Ahab. Amin pe itawarken taneh si terbelangen ras duit si melala. Kesetian Nabot man keluargana ras man Tuhan teridah arah ia empertahanken taneh pusaka. Adi duit banci icariken, tapi adi taneh idayaken e mereken kemusilen man sinursur. Nabot erkeleng ate man sinursurna ras man sukuna. Nabot la ngukuri dirina saja entah ndarami erta man gunana saja. Bagi Tuhan enggo mpekena-kena ia i bas taneh pusaka e nari, bage ka me Tuhan mpekena kena sinursurna. Bagem kinitekenna.